

T. LVCRETI CARI

languidior porro disiectis disque sipatis.  
amplius hoc fieri nil est quod posse rearis  
talibus in causis, nedum variantia rerum  
tanta queat densis rarisque ex ignibus esse.  
id quoque, si faciant admixtum rebus inane, 655  
denseri poterunt ignes rarique relinqui.  
sed quia multa sibi cernunt contraria †muse†  
et fugitant in rebus inane relinquere purum,  
ardua dum metuunt, amittunt vera viai,  
nec rursus cernunt exempto rebus inani 660  
omnia denseri fierique ex omnibus unum  
corpus, nil ab se quod possit mittere raptim;  
aestifer ignis uti lumen iacit atque vaporem,  
ut videas non e stipatis partibus esse.  
quod si forte alia credunt ratione potesse 665  
ignis in coetu stingui mutareque corpus,  
scilicet ex nulla facere id si parte reparcent,  
occidet ad nilum nimirum funditus ardor  
omnis et ⟨e⟩ nilo fient quaecumque creantur.  
nam quodcumque suis mutatum finibus exit, 670  
continuo hoc mors est illius quod fuit ante.  
proinde aliquid superare necesse est incolume ollis,  
ne tibi res redeant ad nilum funditus omnes  
de niloque renata vigescat copia rerum.  
nunc igitur quoniam certissima corpora quaedam 675  
sunt quae conservant naturam semper eandem,  
quorum abitu aut aditu mutatoque ordine mutant  
naturam res et convertunt corpora sese,  
scire licet non esse haec ignea corpora rerum.